

par mon entremise aye recours à celui qui t'a fait, ces trompeurs ne te fçauroient guerir.

Elle exhorte les nouveaux Chrestiens, à donner bon exemple aux Fidelles, & Infidelles, afin que le sainct Nom de Dieu ne soit point blasphemé

La crainte de Dieu & du peché, se graue sensiblement dans les cœurs de ces bons Neophytes, les enfans mesme commencent à prendre le party de la vertu, [114] si leurs peres & meres par mesgarde, ou par vne vieille habitude, laissent fortir de leurs bouches quelques paroles meschantes, ces pauvres petits leurs disent qu'ils s'en doiuent confesser, & qu'ils offensent Dieu, qu'ils le chassent de leurs cabanes, pour y faire entrer le meschant Manit8.

Les Dimanches & les Festes ils assistent tous ensemble à vne Messe, qui se dit expressement pour eux: car comme la Chappelle est trop petite pour tenir les François & les Sauvages, on les appelle separement au diuin Service: Au commencement on les fait prier tout haut, puis on leur fait vne petite instruction en leur langue; en suite on chante l'eau beniste: Pendant l'éléuation on leur fait faire quelques actes de foy, d'esperance, & d'amour; & apres le sacré Office on leur fait chanter quelque Cantique spirituel, qui nourrit en leurs cœurs la deuotion.

Vne bonne-femme nouvellement baptisée, estant inuitée à vn festin, voiant qu'on parloit de tout manger, fuiuant leur ancienne superstition, se voulut retirer, disant, qu'il n'estoit pas permis aux Chrestiens d'entrer aux banquets, où Dieu estoit offensé: [115] Celle qui faisoit le festin luy dit; Les Peres ne vous defendent pas d'assister à ces festins, mais bien d'en faire: Les Peres, respondit-elle, defendent nos excés;